



Broj: 01/3-50-3-3-12/16

Sarajevo, 10.11.2016.

Z A B I L J E Š K A

s radnog sastanka Komisije za vanjsku trgovinu i carine Predstavničkog doma PSBiH i Uprave za indirektno oporezivanje BiH, Regionalni centar Tuzla, održanog 10. novembra 2016. godine

Na 12 sjednici Komisije za vanjsku trgovinu i carine (u daljnjem tekstu: Komisija), održanoj 2.11.2016., zaključeno je da će članovi Komisije u narednom periodu organizirati posjete regionalnim centrima Uprave za indirektno oporezivanje BiH, počev od RC Tuzla, o čemu će blagovremeno obavijestiti UIOBiH, a povodom Informacije UIOBiH i dopisa špeditera i firmi uvoznika polovnih motornih vozila s područja Regionalnog centra Tuzla.

Sastanak je održan u prostorijama Regionalnog centra Tuzla, s početkom u 11 sati.

Sastanku su prisustvovali: predsjedavajući Komisije Šemsudin Mehmedović, prvi zamjenik predsjedavajućeg Komisije Nenad Lalić te članovi Komisije: Mensura Beganović, Miroslav Milovanović i Mirsad Mešić, sekretarka Komisije Mirjana Crnjak i stručni savjetnik u Komisiji Radomir Marjanović.

Opravdano su odsustvovali: Nikola Lovrinović, Safer Demirović, Nikola Špirić i Zaim Backović.

Iz Regionalnog centra Tuzla sastanku je prisustvovao šef Odsjeka za carine Stevo Filipović, saradnik Nermin Jusić i Dženan Musemić iz Uprave za indirektno oporezivanje BiH Banja Luka.

Svrha radnog sastanka je detaljnije upoznavanje članova Komisije o načinu, uslovima rada i problemima s kojima se Regionalni centar Tuzla susreće, te o aktivnostima, nadležnostima i planovima.

U ime Komisije Šemsudin Mehmedović pozdravio je prisutne i istakao da je ključni razlog zakazivanja sastanka raspravljanje o dopisu špeditera i firmi uvoznika polovnih motornih vozilam s područja Regionalnog centra Tuzla u kojem navode neravnopravan odnos i status u

vezi s nekim instrukcijama koje su date pojedinačno, a suprotne su Zakonu o carinskoj politici.

Dobrodošlicu članovima Komisije poželio je šef Odsjeka za carine Stevo Filipović, koji je upoznao prisutne o osnovnoj djelatnosti, načinu rada i problemima u izvršavanju obaveza. Posebno je ukazao na manjkavosti u saradnji s UIO Banja Luka te drugim regionalnim centrima.

Stevo Filipović upoznao je prisutne o finansijskim pokazateljima poslovanja Regionalnog centra, naročito o povećanju poreskih prihoda u odnosu na prethodni period. Ukazao je i na obim prometa, a naročito na problematiku carinjenja prilikom uvoza polovnih motornih vozila, tekstila i plina. Prilikom uvoza ovih proizvoda, naročito plina i tekstila, rekao je da postoje indicije o mogućim carinskim prevarama i prekršajima zbog kojih Bosna i Hercegovina ostaje bez značajnih carinskih prihoda.

Zbog toga je o ovoj problematici Centar neprekidno pismeno obavještavao Upravu za indirektno oporezivanje Banja Luka, kolege iz drugih regionalnih centara i carinskih prelaza, pa i nadležne institucije BiH, ali je saradnja stalno izostajala. Čak su podnesene i krivične prijave protiv određenih lica, ali se nažalost do sada sve na tome završavalo. Smatra da loša saradnja unutar Uprave pogoduje ovakvim pojavama, a ništa bolja saradnja nije ni s drugim nadležnim institucijama BiH.

U ovakvoj situaciji izložen je stalnim pritiscima pa i prijetnjama lica koja su direktno ili indirektno uključena u navedene izvozno-uvozne poslove. Ni za ovaj problem ne može se naći adekvatno rješenje.

O svim ovim problemima upoznao je i prisutne, te članovima Komisije dao obimnu dokumentaciju iz koje se mogu detaljnije upoznati i uvjeriti u istinitost njegove diskusije.

U raspravi su učestvovali: Nenad Lalić, Mensura Beganović, Mirsad Mešić, Nermin Jusić i Dženan Musemić.

Nakon rasprave, Šemsudin Mehmedović obavijestio je prisutne da Komisija namjerava u dogledno vrijeme upriličiti sličan radni sastanak i s regionalnim centrima Mostar, Sarajevo, i Banja Luka, te tako steći kompletnu sliku o problemima s kojima se susreću regionalni centri UIO i iz toga izvesti zaključak i postupiti u skladu s nadležnostima Komisije.

Ovaj prijedlog prisutni članovi Komisije jednoglasno su prihvatili.

Sastanak je završen u 13 sati.

Sekretarka Komisije
Mirjana Crnjak

Predsjedavajući Komisije
Šemsudin Mehmedović